

Riječ Redakcije

Cijenjeni čitatelji !

U trinaestom broju časopisa *Historijska traganja* za 2014. godinu priredili smo vam četiri veoma zanimljiva rada.

Prvi rad je skraćena verzija magistarskog rada Edina Omerčića pod naslovom “Bosna i Hercegovina u političkim projekcijama intelektualnih krugova 1992-1995. godine”, odbranjenog 8. maja 2013. godine na Filozofskom fakultetu u Sarajevu, u kojem je autor iznio stavove intelektualaca o ustavno-pravnom uređenju Bosne i Hercegovine smještajući problematiku u dnevno-politički kontekst i uvažavajući ratne i političke okolnosti na lokalnoj i međunarodnoj razini.

Agresija na Bosnu i Hercegovinu tema je i drugog članka. Autorica Merisa Karović Babić predstavlja nam proširenu verziju jednog poglavlja iz njenog magistarskog rada pod naslovom “Masovna ubistva civila u Sarajevu za vrijeme opsade 1992-1995.”, odbranjenog 15. maja 2013. godine na Filozofskom fakultetu u Sarajevu. Na osnovu obimne dokumentacije, autorica u svom radu elaborira upotrebu modificiranih aviobombi koje su osim efekta psihološkog terora nad stanovništvom, ubile mnogo civila i načinile veliku materijalnu štetu.

Treći rad napisala je vrsna arhivistkinja Mina Kujović na osnovu samo nekoliko dokumenata sačuvanih u Arhivu Bosne i Hercegovine. Autorica je u svom radu analizirala odjek novog svjetskog i evropskog pedagoškog pokreta u Sarajevu. Na primjerima organiziranih tečajeva *radne škole* ili *škole rada* u 1931. i 1932. godini, autorica je približila nastojanja prosvjetnih radnika u inoviranju nastavnih planova i programa.

Četvrti rad je Hane Younis, koja je, na osnovu povijesnih izvora različite provenijencije, oslikala život žene u posljednjim desetljećima osmanske uprave u Sarajevu. Priča o Daši Jelić, rekonstruirana prema sadržajima sačuvanih

pisama, približila nam je mnoge aspekte iz svakodnevice jedne od srpskih trgovačkih porodica u Sarajevu u 19. stoljeću.

Nakon ovih kratkih napomena o sadržaju časopisa, srdačno vas pozivamo na suradnju.

Redakcija